



र 5/

तुबारि

www.pangi.in

अब अंग्रेजी, हिन्दी त
पंगवाड़ी भाषा अन्तर असी।

Issue 76; 17/07/2018

बिषय सूची

पांगेई कतु खरु असु	1
कुई पढ़ाण दिए, कुई बचाण दिए।	2
मेहणु सोच	2
आत्म सम्मान	3
मदती लिए प्रार्थना	4
खास बोके	4

तुस बुन्ह दुतो नम्बर बठ फोन कइ सकते त अकाशवाणी जे बोक कइ सकते। तुस अपु मनपसन घीते शुण सकते। होर तुस अपु समाचार बी दी सकते, से बि पांगेई भाषा अन्तर।

AIR SHIMLA- 0177
2808152

धाणि त तसे जुएली केआं अब सते बंटी अठ फेरे लवाण चाहिए। सत फेरे तेन्के व्याहे, आठुं जे फेरा असा, से कुई जे लवाण चाहिए कि से कुई बचांते त तेस पढ़ान्ते ।



पांगेई कतु खरु असु!

पांगेई कतु खरु असु
केसे केसे कोई पता नेई,
किस कि में पांगेई असु
सोबी केआं खरु।

पांगेई कतु खरु असु
एटि भुंतु नीलु नीलु घास त
ठानु ठानु पुओणी
हैं पांगेई जे सोबी के मन
लर्चीता।



किस कि ए स्वर्ग केआं कम नेई।
पांगेई कतु खरु असु
पांगेई मेहणु सोबी केआं खरे भुंते।
पांगेई मेहणु बोड़े भारी दहापुरे भुंते।



सोबी की खरी दहा कते
सोबी अपु मनते,
पांगेई कतु खरु असु
किस कि सोब मेहणु यक होरी
जोई
उई मी कइ बिश्ते।
तेसे बेलि पता लगता कि
ए कतु खरे अब्बल असे,
पांगेई कतु खरु असु।

गर्मी अन्तर त ए सोबी केआं सुआ अब्बल केतु।
मन कता कि पांगेई कियां बहेरी ना घेण,
किस कि किरस्मी.किरस्मी फियुइ भुंते, से ती अब्बल लगते।

यक झलक में पांगेई कना
अउं पांगेई एई गा।
अउं खुश असा कि अउं पांगेई गा।

मोउं की बताण
पांगेई मोउं की मेई गोउ।
तुसी जोई एन्ही अब्बल बादी अन्तर
जिन्दगी जीणे यक मौका मेई गोउ।
विनोद कुमार 9459828290



तुबारि पत्रिके अन्तर छपो सोबी लेख, त कथा अन्तर
भुओ विचार सिर्फ लेखके भो। तुबारि पत्रिके एसे कोई
जिम्मेबारी नेई। तुबारि पत्रिका सिर्फ भाषा सुहलियत करण
जे यक मंच देण लगो असी।



कुई पढ़ाण दिए, कुई बचाण दिए



अचेल मेहणु कुई त कोयी बुछ भेदभाव कते। जेसे गी कुआ जम्मता त जाठ लगती। जिखेई कुई जम्मती त सम्हाई परशान भुन्ते। केहि त कुई जम्मती त तिखेई मार छते होर केहि त ई कते कि कुई ना पाइते। केहि पाइता त झठ जे कुई ब्याह कती। तठ भी दहज देण पड़ता। केहि त जिखेई कुई जम्मती त तस कलंख सोचते। अउं बोती कि कोई बी कुई दुनिया जे कलंख ना भुन्ति।

अचेल त कुई कोयी केआं बधण लगो असी। कोउं ई जगह नेई जेठि कुई ना पुजो भोल। अंतरीक्ष अन्तर कल्पना चावला पुज गो असी। सोउं भारते बोर्डर पुठ बि कुई रात भई पेहरा देन्ति। तेन्हि अपु ईये बोउए नोउ रोशन करण असु। अउं त बोती कि कुई ना केस केआं कम थी, ना असी, ना भुन्ति। में एस बोक सम्हाई याद रखे की 'कुई पढ़ाण दिए, कुई बचाण दिए'।

मीनाक्षी, अष्टम कक्षा, सरस्वती विद्या मंदिर, किलाड



अचेल असी गीहा बहार घेण देन्ते ई नाओ। जिखेई बि घिए त पुछते कि 'को जे गो असी तु?' जेस कुई अपु ईए बोउए डर न भुन्ता, से कुई अपु नश घेन्ति। इस लिए श्री नरेद्र मोदी जी बोलु कि 'कुई पढ़ाण दिए'। केहि कुई के ई बोउ तेनि अपु गी कमुंण जे रखते। सिद कुआ पढ़ान्ते। कुई बी पढ़ाण चहिए। कुई अपु अकेले बहार घेण न दे। अचेल कुआ कुई छेड़ते। कुई जिखेई बोडी भोल त ईए बोउए सेवा कती। कुआ अपु अवारे भुन्ते और ईए बोउए सेवा ना कते। इसलिए अपु कुई पढ़ाण दिए, से तुं नोउ रोशन कती। तोउं मोटे भोई कर कुछ बण कर हराळती। तोउं त 'बेटी पढ़ाण दिए, बेटी बचाण दिए', नारा दितो असा बे। सिर्फ कुआ ना कुई बि पढ़ाण दिए।

ईशीता, सप्तम कक्षा, सरस्वती विद्या मंदिर, किलाड



मेहणु सोच

यक लिंग टाई मितर यक गडी अन्तर कुरैह जे गो थिए। तेन्के गाडी एक्सिडेन्ट भोई गई त से टहिओ मर गो। यम दुती से यमलोक जे नी छड़े। जिखेई से यमलोक पुजे त यमराजे तेन्हि केआं पुछु: तुस अपुं बारे अपुं मितरी केईआ कीं शुणुण चहन्ते?"



पेहला तेन बोलु, "अउं अपु मितरी ई बोते शुणुण चहन्ता कि अउं कतु खरा डाक्टर थिआ त मेई कतो मेहणु ठीक किए।"

दोके तेन बोलु, "अउं अपु मितरी ई बोते शुणुण चहन्ता कि अउं कतु खरु पढ़ान्ताथ। में पढ़ाओ गभुर केतो बोडे अफसर बण गो असे।"

टेके मितरे धिक सोच कइ बोलु, "अउं अपु मितरी ई बोते शुणुण चहान्ता 'हेरे, ए लुकुण लगो असा।"

आत्म सम्मान

षम्मा सिंह

मनीष नोउए यक कुआ थिआ। से बारमी पास कर कइ पेहली पेहली बार कॉलेज गा। तथ होरे गभुर हेर कइ तस तीं परेशानी भुई। तस ई पता लगण नेओथ लगो कि ए गभुर एतु खुलकइ कीं बोकधोक कते, कीं होरी जुए घूमते फीरते त पढ़ाई बि कते। ई नेई कि से हेरण बिलकुल कुस्तुरा थिआ, होर पढ़ाई अन्तर कमजोर थिआ। पर तस लगतुथ कि होरे गभुर तस केआं ज्यादा अब्बल त स्मार्ट असे। तसे बि मन कताथ कि से बि मज्जे जुए बिशे त तसे बि यारी-दोस्ती भोल। पर से हमेशा चुपचाप बिश्ताथ त होरी जुए राइताथ नाओ। मनीष जुए जे भुण लगो थी, तस जे बोते 'आत्म सम्माने कमी'। जीं हैं जिसम अन्तर विटामिन-A कमी भुणे बेलि नजर कमजोर भोई घेन्ति, तीं आत्म सम्माने कमी भुणे बेलि मनखे जीवन अन्तर सुआ मुश्किले एन्ति। एईए, इस फेरी हेरते कि आत्म सम्माने कमी भुणे बड़ाह की की असी।



परेम त कदरे कमी: मठड़ियारी केआं अगर केसे सुसुर परेम ना मेओ भोल, होर तसे केनि कदर ना किओ भोल त तेस केई आत्म सम्माने कमी भुन्ति। तेन्हि लगतु कि तेन्के कोई अहमियत नेई, होर तेन्के सोचे कोई मुल नेई।

आत्म विश्वासे कमी: मठड़ गभुर जे जपल अस इज्जत देन्ते, तेन्के बोक शुणते, तेन्के ठीक किओ बोकी के कदर कते त तेन्के आत्म विश्वास बधता। पर अगर अस तेन्के होर बोकी पुठ नाह कते त तेन्हि अन्तर आत्म विश्वासे कमी एन्ति। एसे बेलि तेन्के आत्म सम्मान बि कम भोई घेन्ता।



दोस्ती के जोर त गुण्डागर्दी: दोस्ती के जोर त गुण्डागर्दी बेलि बि आत्म सम्माने कमी भुन्ति। जपल कोउं दोस्ती के जोर अन्तर दबी कइ अपु इच्छाई खिलाफ कम कता त तस अन्तर आत्म सम्माने कमी एई घेन्ति। मठड़ियारी अन्तर गुण्डागर्दी बेलि बि आत्म सम्माने कमी भोई घेन्ति।

अपु पेछाण ना भुण: जपल असी केई अपु बारे सुसुर जानकारी ना भोल त असी अन्तर आत्म सम्माने कमी एन्ति। तोउं त, जपल अस मठड़ भुन्ते, हैं अन्तर आत्म विश्वास घट भुन्ता, पर जपल बोडिन्ते घेन्ते त असी अपु बारे सुसुर जानकारी मेती होर अस अपु इज्जत बि कते। कपले कपले अस अपफ ना पेछाण कइ होरी जोई बराबरी करणे कोशिश कते। होर नाकमियाब भोई कइ दुखी भोई घेन्ते त अपफ जे गये देन्ते।

हैं बुछ सोबी के कोई ना कोई आदर्श असे। केहि जे शहिद कपूर त केहि जे आलिया भट्ट, होर केहि जे विराट कोहली त केहि जे मिताली राज होर सानिया मिर्जा असी। अस एन्हि अपु आदर्श मानते किस कि ए जे बि कते, अपु अपु कम अन्तर अब्बल त महेर भुन्ते। एन्हि सोबी अन्तरा यके बोक साधारण असी, से भो: एन्के 'आत्म विश्वास' त एन्के अन्तर भो 'आत्म सम्मान'। याद रखे कि अगर अस अपु अपफ सम्मान ना देन्ते, अपु इज्जत ना कते त दुनिये मेहणु बि कदी हैं कदर ना कते। होर फेरी अस हेरते कि कीं कइ अपु आत्म सम्मान बधाइ सकियेल।

मदती लिए प्रार्थना

ए परमेश्वरा, मोउं बचाण दे, किस कि यक बि भक्त न रिहा। मेहणु अन्तरा विश्वास करणे लेख सोब मरी मुखि गे।

हरेक मेहणु अपु भैयाड़ी जुएई झूठी झूठी बोके बोते।

से चाथि चुगिलि करणेबाड़ी, ओठी बड़ दोगली बोके कते।

प्रभु सोब चुगिलि करणेबाड़ी ओठि त तेस जिभुड़ जेसे बेलि बोडी बोडी बोके निसती काट छता।

से बोते, "अस अपु जिभुड़ बड़ जीतते। हैं ओठ हेन्दरी वश अन्तर असे। हैं प्रभु कोउं भुओ?"

दीन-दुखी मेहणु लुटणे त गरीब मेहणु टड़णे बझई जुएई, परमेश्वर बोता, "अब अउं खड़ीता।

जेन्हि पुठ से बाधेरी लांते, तेन्के धे अउं चैन जुएई अराम देन्ता।

परमेश्वरे वचन शुचा असा, से अगी अन्तरा जन पुठ तचाणो त सत लिंगि नरम कियो तेस चॉन्नी ई असी।

तुईए ए भगवाना! तेन्के रक्षा कता, तेन्हि इस जवाने मेहणु केईया हमेशा लिए बचाई रखता।

जपल मेहणु घटियापने इज्जत कते, तपल पापी मेहणु चोहरो कना अकड़ी कइ हंठते फिरते रेहंते।

ए परमेश्वरा, कपल तकर! तु कि हमेशा मोउं बिसरी रखता ना?

तु कपल तकर अपु मुहँ मोउं केईया नियोकई रखता?

मोउं कपल तकर अपने मने मन अन्तर उपाये बणांते रेहण, त दन भइ अपु मन दुख कता रेहुं?

कपल तकर में दुश्मण मोउं पुठ भारी रेहाल?

ए में भगवाना, में कना जे ध्यान दे त मोउं जे जबाव दे।

में टीरी अन्तर टगड़ियार एण दे, न त मोउं मरणे उंघ एई घेण असी।

ई न भुओ कि में दुश्मण बोलियाल, "अउं तेस पुठ भारी पड़ गा,"

त इ न भोल कि जपल अउं भटकण लगुं त में दुश्मण मौजमस्ति करियेल।

पर मेई त तें दाह पुठ भरोसा रखो असा। में दिल तें दाह दया पुठ मस्त मगन भुन्ता।



तुबारि मासिक पत्रिका

◆अस इ उम्मिद करुं लगे असे कि एण बाड़े रोज अन्तर सुआ मेहणु इस कम अन्तर साथोट देन्ते।

◆इस तुबारि मासिक पत्रिका समाचार पत्र एकट अन्तर रिजिट्टि नेई भो। सिर्फ पांगी घाटि अन्तर पढ़ुं जे त भाषाई सुहलियत करण जे इ पत्रिका शुरु किओ असी।

◆तुबारि यक अवाणिज्यिक पत्रिका भो।

◆तुबारि पत्रिका कोई मेहणु, जनजाति, त संस्कृति गलती कढेण जे नेई छपाण लगो। अगर कोई ई सोचता बि त अस जिम्मेबार नेई।

◆छपाणे पेहे सोभ आर्टिकल दुई टाई पांगेई मेहणु हरालो असे। इ त खुली बोक असी कि पेहलि बार पांगवाड़ि लिखणे सुआ मुशकिल भुन्ति त गलती बि भुन्ति। अगर कोई लिखणे गलती असी त असी जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल्स ना मिलेल, या घाटि मेहणु के साथोट ना मिलेल त तुबारि पत्रिका कदी बि बंद भुई सकती।

◆कोई चीज छपां असी या नेई छपां जे तुबारि संपादकीय टीम पुरा अधिकार असा।

◆अस किलाड़ केन्द्रीय पुस्तकालय, त बजार हरिराम लाले दुकान अन्तर तुबारि ड्रॉप बॉक्स पुठ बि अपु सझाव ओर आर्टिकल्स रखुं जे सुविधा किओ असी।

◆अस सोबी पांगी मेहणु जे हात जोड़ कइ अनुरोध कते कि, तुस बि कोई अछा आर्टिकल, पुराणि या नौई कथा, कहावत, कविता, त नौई घीत (पागवाड़ी अन्तर) लिख कइ छपां जे हेघे दिए।

तुबारि संपादकीय टीम

9418429574

9418329200

9418411199

9418904168

9459828290



खास बोके

कदर करीण असी त जीते

जी करे, मरण केईया पता

त पराईए बि रोल छते।

आज जिसम अन्तर जान

असी त हेरते बि नऊ।

मेहणु जपल रुह निस

घिएल त कफण घराई घराई

हेरते। केनि ठीक लिखो असु वक्त किढ़ कइ बोके

करियां करे। अपु तेन्हि जुएई अगर अपनेई न रेहियेल

त तेस वक्ते की कते?

घमण्ड केस बोकी, जनाव? आज 'जन' पुठ असे त शुई

'जने' पड़डे भुन्ते।

